

**PRU13: Najib Tiba Di Sarawak Untuk Lawatan Kerja Sehari
Bernama
26 April, 2013**

KUCHING, 26 April (Bernama) -- Perdana Menteri Datuk Seri Najib Tun Razak tiba di sini Jumaat untuk memulakan lawatan kerja sehari ke Sarawak esok dengan mengunjungi kawasan Saratok, Lubok Antu, Kuching dan Sibu.

Pesawat khas yang membawa Perdana Menteri dan isteri Datin Seri Rosmah Mansor mendarat di Lapangan Terbang Antarabangsa Kuching pada 9.25 malam.

Ketibaan Najib disambut oleh Ketua Menteri Tan Sri Abdul Taib Mahmud dan isteri Puan Sri Ragad Kurdi Taib serta barisan kabinet negeri dan pemimpin-pemimpin masyarakat negeri.

Selaras dengan program kempen Pilihan Raya Umum ke-13 (PRU13), Najib mempunyai jadual yang padat dengan menghadiri beberapa majlis pemimpin bersama rakyat, dengan program pertama di Dataran Krian, pekan Saratok pada Sabtu pagi.

Kemudian beliau juga akan menghadiri pula Majlis Pemimpin Bersama Rakyat di Rumah Awing Merindun, Lubok Antu sebelum menghadiri program yang sama di Dewan Masyarakat Kampung Semeba, Kuching.

Najib, merangkap Pengerusi Barisan Nasional (BN), kemudian akan menghadiri majlis perasmian sekolah dan pecah tanah blok baharu Sekolah Jenis Kebangsaan Chung Hua No 2, Jalan Stutong di sini.

Beliau akan mengakhiri lawatannya dengan menghadiri Majlis Pemimpin Bersama Rakyat di hadapan Hotel Paramount, Jalan Kampung Datuk di Sibu, sebelum pulang ke Kuala Lumpur.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=945506>